



26. august 2014

UKA 2014/92

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imattoq saqqummiuppara:

**Umiarsualivimmik nunarsuarmi piumasaqaatinut naammassinnittumik sanasoqarnissaanik Naalakkersuisut misisueqqullugit Inatsisartunut aalajangiiffigisassatut siunnersuut.**

(Inatsisartunut ilaasortaq Doris Jakobsen, Siumut)

**Tunngavilersuut:**

Qalasersuuq aakkiartornerata kingunerisaanik umiarsuit Sullualukkoortartut amerlatsikkiartornissaat ilimagineqarpoq, tamassumalu malitsigisaanik umiarsuit amerlanerit nunarput sinertalissagaat aamma ilimagineqarluni.

Juni qaammat Folketingemi Nunanut allanut Sillimaniarnermullu aaliangiisartut (Udenrigspolitiske Nævn) ilaasortaqtikkalu Washingtonimut, Ottawamut aammalu Iqaluk-nut angalavugut, nunani issittuni periusissaq paasisassarsiorfigartorlugu. Pulaakkatta ilagivaat, The White House, Pentagon, US Navy il. il.

USA-miinnitsinni Canada-miinnitsinnilu Qalasersuup sukkasuumik aakkiartornera sammineqarpoq, malitsigisaanillu umiarsuit takornariartaatit allallu Sullualukkut ingerlaartalernerunissaat aamma eqqartorneqarluni.

Pilerautigineqarpoq Canada-p avannaani umiarsualivissuit marluk sananeqassasut, paasisakka naapertorlugin sakkutuunut, sillimaniarnermut, nakorsaatinut, orsiivittut allatullu atorneqartussat. Umiarsuit ingerlaartarfissaat malillugit umiarsualiviit taakku inissinneqassapput.

Qalasersuarmiik Canada akulloqqullugu aammalu nunatta avannaarsuata tungaatigut Canada-mi umiarsualiveqalertussaapput, aqquq alla ingerlaarfingineqartartussaq tassaavoq Europamut nunatta kangia sanioqqullugu. Qularinngilluinnarpala umiarsualiviliornerni nunarput peqataasuuppat ullumikkut pilerausiorneq allaanerussagaluartoq.

Nunarsuarmioqataanitsinni nunarput pingaarutilittut inisisimavoq, tamanna atorluartariaqarparput siunissaq ungasinnerusoq isigalugu. Allat pilerausiorlutik aallartereerput, nunarput aamma peqataasariaqaraluarpoq. Isumaqarpunga siunertaq akisungaluartoq siunissami imminut akilerluarsinnaasoq.

Taamatut tunngavilersuuteqarlunga, siunnersuutingaara nunatta avannaani nunattalu kangiani Sullualukkoorlutik ingerlaartartussanut umiarsualiviliornissaq misissorneqassasoq.

**Siunnersuutip pisortanut aningaasaqarnikkut allaffissornikkullu kinguneqaatissai**

Misissuineq Namminersorlutik Oqartussanut allaffissornikkut aningaasartuutaassaaq, AC-tut atorfillip ukiup affaanik sulineranik, 250.000 kr.-nik naleqartumik. Aamma paasisassarsiorluni angalarernut, paasititsiniaanernut allanullu saniatigut 250.000 kr.-it aningaasartuutanissaat naatsorsuutigineqarpoq.

**Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai**

Soqanngilaq.

**Siunnersuutip innuttaasunut allaffissornikkut aningaasatigullu kinguneqaatissai**

Soqanngilaq.